

Entrevista exclusivo cu Lucky Dube...

"MI NO TA HUMA NI BEBE"...

Fotos y Texto : Poets.



** Ayera mainta e estrea di reggae Lucky Dube a yega Aruba hunto cu su manager y musiconan. Na su yegada na nos Aeropuerto Internacional Reina Beatrix, Lucky Dube a ser ricibi pa e dos promotornan Ochi Henriquez y Carlos Jacobs. Manera fotonan mes ta ilustra cu e recepcion di su yegada na aeropuerto tabata uno caluroso na unda varios di e empleadonan cu ta labora na aeropuerto a demostra nan simpatia y atencion pa Lucky Dube.

Lucky Dube mes a keda hopi contento pa e forma caluroso cu el a ser ricibi y a expresa na DEN AMBIENTE cu e gesto bunita aki ya a dune e prome impresion cu nos hendenan ta hopi amical.

Lucky Dube a yega

Aruba procedente for di Curacao, despues di a duna dos exitoso presentacion na Brasil. Ayeratardi DEN AMBIENTE a realiza un entrevista exclusivo cu Lucky Dube na Cristal FM, na unda el a relata cu e no ta huma, bebe y bay misa. El a duna un bon splicacion pa e motibonan cu e no ta bay misa, debi cu hopi hende ta usa misa pa metanan falso y politico, pero den e mesun rosea e ta expresa cu e tin hopi fe den DIOS, cu DIOS ta sigiue na unda cu e bay, pues e ta conciente cu e no por haci nada malo, pasobra DIOS ta vigile y esey ta mas importante pa su persona.

Lucky Dube a declara cu e no ta huma ni bebe. E no ta di acuerdo cu pa ser un rastaman, bo

DEN AMBIENTE

mester tin cabay di locks y huma gancha. E ta sigui añadi cu ta artistanan famoso manera Peter Toch y Bob Marley a crea e imagen aki, pero na Africa prome cu e musica di reggae a bira conoci, for di hopi tempo caba e hendenan tabata tin nan cabeynan den estilo di locks y tabata huma gancha, pero esaki no ta den e caso di Lucky Dube,

kende den un forma sincero a bisa cu e no ta huma gancha.

Tambe un parti interesante di entrevista aki tabata na unda el a declara cu durante e temporada di President Pieter de Klerk, tabata un temporada peligroso pa e musiconan kendenan no por a expresa nan protestanan, pero awor aki si cu Presidente Nelson Mandela esaki ta posibel.

Interesante tabata e momento cu Lucky Dube a relata e historia con su mayornan a bin na su nomber Lucky despues di seis luna di nacemento. Tabata asina cu su mama pa un temporada largo no por a haya yiu y finalmente el a duna lus na un yiu homber cu a nace malo y a fayece despues di tres luna. Despues cu

su mama a duna lus na un otro yiu homber, Lucky Dube tambe a nace malo, pa cual su mayornan a kere cu e tambe ta bay fayece y no a risca pa pone un nomber pe. Pero despues di seis luna cu e no a fayece, el a ser bautisa bao di e nomber Lucky, ya cu su mayornan ta concidere como un yiu di hopi suerte.

Durante e entrevista interesante aki, Lucky Dube a demostra di ta un artista noble y decente. Lucky Dube ta un di e poco artistanan di reggae cu ta expresa mensahenan positivo y sincero den casi tur su hitnan. Ta pesey mes Lucky Dube merece un aceptacion masalmente durante su concierto mayan anochi den Joe Laveist Sport Park...

